

15.04.2026

UKA2026/412

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Tasiilaq, Kulusuk, Nerlerit Inaat aamma Ittoqqortoormiit ukioq kaajallallugu aalajangersimasumik silaannakkut kiffartuunneqarnissaat, inoqarfiillu akornanni pisariaqartinneqartunik angallannikkut attaveqarnissaq kiisalu Islandimut silaannakkut attaveqarnerup ingerlaannarnissaa pitsanngorsarneqarnissaalu kiffartuussinissamut isumaqatigiissutit nutarterneqarnissaanni qulakkeeqqullugit, taamatullu isumaqatigiissutit atuuttut iluanni periarfissat atorpeqarsinnaasut piaartumik atorlugit ilaasunik, allakkanik nassiussanillu angallassinernup pitsanngorsarneqarnissaa Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Mette Arge-Hammeken, Naleraq)

### **Tunngavilersuut**

Nunatta Kangiani silaannakkut angallanneq innuttaasunut inuiaqatigiinnullu pingaaruteqarluinnarpoq. Nunarput isorartoorujussuuvoq inoqarfiillu imminnut ungasillutik inissisimallutik. Nunatta Kangiani angallannikkut periarfissat killeqarnerat pissutigalugu silaannakkut attaveqarneq innuttaasut ulluinnarni inuunerannut, peqqinnissaqarfimmut, inuussutissarsiornermut, takornariaqarnermut pisortallu sullissinerannut pingaaruteqarluinnarpoq.

Tasiilaq, Kulusuk, Nerlerit Inaat aamma Ittoqqortoormiit akornanni ukioq kaajallugu patajaatsumik angallannissamut periarfissaqarnissaq Nunatta Kangiani innuttaasut akornanni attaveqarnermut pingaaruteqarpoq. Peqatigisaanik Islandimut silaannakkut attaveqarneq, pingaartumik Ittoqqortoormiit eqqarsaatigalugu, nunatta sinneranut aammalu nunatta avataanut angalanissamut pingaarutilimmik inissisimavoq.

Maannakkut kiffartuussinermi innuttaasut angalanianerminni inissakilliornermik, kinguaattoornernik, timmisartuussinernit taamaatiinnarneqartarnerannik kiisalu allakkanik, poortukkanik nassiussanillu apuussinermi ajornartorsiutinik nalaataqartarput. Tamanna innuttaasunut ataasiakkaanut ilaqutariinnullu kisimi sunniuteqanngilaq, aammali inuussutissarsiornermut, pisortat sullissinerannut inuiaqatigiillu nalinginnaasumik ingerlanneqarnerannut sunniuteqartarluni.

Nakorsaatit, inuussutissat, atortussat pisariaqartinneqartut aammalu inuiaqatigiinnut pingaarutillit allat piffissaq eqqorlugu apuunneqarnissaat immikkut pingaaruteqarpoq.

Kinguaattoortoqartillugu imaluunniit timmisartuussinerit taamaatiinnarneqartillugit inuiaqatigiinnut pingaarutilinnik pilersuineq sapinngisamik salliutinneqartariaqarpoq.

Naalakkersuisut § 37 naapertorlugu apeqquteqaammut nr. 105/2026-mut akissutaanni paasissutissiissutigaat Nerlerit Inaata Islandillu akornanni kiffartuussinissamut isumaqatigiissut atuuttoq 2027-mi juunip naanerata tungaanut atuuttoq. Naalakkersuisut aamma ilisimatitsipput 2027-mi juulimit nutaamik kiffartuussinissamik isumaqatigiissusiornissamut atatillugu angalasunut maani najugalinnut tapiissuteqarnissamut imaluunniit bilitsinik qulakkeerinninnissamut periarfissat misissorneqartut.

Akissummi aamma erserpoq isumaqatigiissutip atuunnerata nalaani pitsanngorsaatinik aalajangersimasunik atuutsitsisoqarsinnaasoq. Nassiussat amerliartornerat pissutigalugu qaammatini arlalinni saniatigut timmisartuussisoqarsimavoq, aammalu Akureyri saniatigut Reykjavikimit sapaatip akunneranut ataasiarluni aallarfissamut periarfissaq atuutsinneqalersimalluni.

Tamanna takutippaa kiffartuussinissamut isumaqatigiissutit nutarterneqarnissaannut utaqqiinnarnani maanna ajornartorsiutit ilaat aaqqiivigineqarsinnaasut. Taamaattumik Naalakkersuisut isumaqatigiissutit atuuttut aammalu aningaasaliissutit pioreersut iluanni periarfissat atorineqarsinnaasut tamaasa atorlugit, innuttaasut ilaasunik, allakkanik nassiussanillu angallassinermi maanna nalaataat piaarnerpaamik pitsanngorsarniarlugit iliuseqarnissaat siunnersuutikkut kissaatigineqarpoq.

Peqatigisaanik siunissamut ataavartumik aaqqiissutissaq pisariaqarpoq. Kiffartuussinissamut isumaqatigiissutit nutarterneqalerpata Nunatta Kangiani innuttaasut pisariaqartitaat qitiutinneqartariaqarput. Tasiilaq, Kulusuk, Nerlerit Inaat aamma Ittoqqortoormiit akornanni ukioq kaajallugu aalajangersimasumik silaannakkut angallassisoqartarnissaa kiisalu Islandimut attaveqarnerup ingerlaannarnissaa pitsanngorsarneqarnissaalu siunissami kiffartuussinermut ilaatinneqartariaqarput.

Ittoqqortoormiit nutaamik mittarfittaarnissaa pillugu suliaq ingerlanneqarpoq. Mittarfiup atulersinneqarnissaata tungaanut innuttaasut naammaginartumik angallannikkut kiffartuunneqarnissaat suli qulakkeerneqartariaqarpoq. Siunissami mittarfiup nutaap atuutilerneratigut angallannikkut aaqqissuussineq allanngortussaagaluartoq, innuttaasut ullumikkut nalaataat ukiuni arlalinni utaqqisinneqartariaqanngillat.

Siunnersuut taamaalilluni marlunnik siunertaqarpoq: siullermik isumaqatigiissutit atuuttut iluanni periarfissat pioreersut atorlugit maanna kiffartuussinernerup piaarnerpaamik pitsanngorsarneqarnissaa; aappassaanik kiffartuussinissamut isumaqatigiissutit

nutarterneqalerpata Nunatta Kangiani siunissamut ukioq kaajallugu patajaatsumik angallannikkut aaqqissuussisoqarnissaa.

Nunatta Kangiani innuttaasut sumi najugaqarnerat pissutigalugu angallannikkut pilersuinikkulluunniit periarfissakinnerusumik atugassaqartinneqartariaqanngillat. Innuttaasut sumi najugaqaralarunilluunniit pitsaasumik, patajaatsumik aammalu pisariaqartitaminnut naapertuuttumik kiffartuunneqarnissaat anguniarneqartariaqarpoq.

### **Oqallilluarisi, qujanaq.**

#### **Pisortanut aningaasatigut allaffissornikkullu kingunerisassat**

Pitsanngorsaatit sorliit ingerlanneqassanersut apeqqutaalluni siunnersuutip aningaasatigut kingunerisassai maanna aalajangersimasumik naatsorsorneqarsinnaanngillat.

Pitsanngorsaatit sapinngisamik aningaasaliissutit pioreersut iluanni ingerlanneqarnissaat anguniarneqarpoq, Naalakkersuisullu § 37 naapertorlugu apeqquteqaammut nr. 105/2026-mut akissutaat innersuussutigineqarpoq. Qaavatigut aningaasaliisoqarnissaa pisariaqalissappat tamanna Inatsisartuni aningaasaliissuteqartarnermut periutsit nalinginnaasut naapertorlugit suliarineqassaaq.

#### **Namminersorluni inuussutissarsiuteqarnermut aningaasatigut allaffissornikkullu kingunerisassat**

Siunnersuutip namminersorlutik inuussutissarsiortunut toqqaannartumik aningaasatigut imaluunniit allaffissornikkut kingunerluuteqarnissaa naatsorsuutigineqanngilaq.

Nunatta Kangiani ukioq kaajallugu patajaannerusumik angallanneq aammalu Islandimut pitsaannerusumik attaveqarneq inuussutissarsiortunermut, takornariaqarnermut aammalu nassiussanik assartuussinermut pitsaasumik sunniuteqarsinnaassaaq. Pingaartumik angallannikkut pilersaarusiornissamut periarfissat patajaannerusut inuussutissarsiortunut iluaqutaasinnaapput.

#### **Innuttaasunut aningaasatigut allaffissornikkullu kingunerisassat**

Siunnersuutip innuttaasunut toqqaannartumik aningaasatigut imaluunniit allaffissornikkut kingunerluuteqarnissaa naatsorsuutigineqanngilaq.

Siunnersuutip siunertaraa innuttaasut angallannissamut periarfissaasa pitsaanerulersinneqarnissaat, allakkat poortukkallu nassiussat pitsaannerusumik



apuumneqartarnissaat aammalu Nunatta Kangiani innuttaasunut angallannikkut  
patajaannerusumik kiffartuussisoqarnissaa.